

Identità ladina: n sentiment fon

Aldidanché n muie de jent reiona de esser ladins, ma l'identità ladina l'è vèlch che se cogn sentir tel cher

Aldidanché n muie de jent reiona de identità, sun nosc picol popul ladin vegn fat filmac che vel desbacolèr fora noscia identità, i conta usanzas, tradizioni, i fèsc veder nosc raion da mont, i fèsc sentir ence vèlch rejonèda ladina, dut bel e dut delvers, ma che n sèi chi che vegn chiò entorn demò per pec dis o per n trat de temp, chel che vel dir dalbon se sentir ladins?

L'identità ladina l'è n sentiment che te sentes daite tel cher, l'è la rejonèda, l saer che te fès pèrt de n picol popul, l te recognoscer te na bandiera, ge voler ben a tia tera, ma l'ence fadia e sacrificies.

L'identità l'è chi sons douces de la rejonèda, sons che te resta zipié tel cher per semper, ence se te n vès dalenc da cèsa e no te vegnes più deretorn, l'è chi sons che te cognosces fora de anter e canche t'i sentes te se averc l cher.

L'identità la é serèda te la paroles de tia mèr, che la te tegn per man ti prumes vèrse sul vièl de la vita e la te insegna i bogh valores da tegnir semper a ment: esser valent, ge voler ben ai etres, didèr fora chi che à de besegn, jir d'acort con duc, esser sinzier con te e con chi che te ès apede, ma la te insegna ence a esser fort, a no te lascèr venjer dai despiajeres e dai fac rìes.

L'identità la é te chela pecia paroles che tie pèr disc per te insegnèr a ciapèr l sgol e poder te n jir da la coa, l te insegna a esser na persona da fondament, de ferstont, n galantom, sul lurier e coi etres, a tegnir dur ence canche la strèda la é erta.

L'identità l'è ge voler ben a chel maraveous cianton da mont che l Creator te à donà, da vardèr via e chest vel dir esser tacà a tia tera, con reisc fones desche cheles di peces, saer che alò ti es nasciù e alò semper te sarès a cèsa.

L'identità ladina l'è saer de fèr pèrt de n picol popul, che da tempes veiores stès te anter chisc monts, sentir daite che no t'es, ne t'alian, ne todesch, ma t'es ladin!

Te fès pèrt de n popul che n muie aessa volù schicèr e descancelèr, ma che enzeve l'è fat de jent forta, che con gregn sacrificies à tegnù fora meseria e veres, con fadia l se à tirà su, per poder lurèr e viver te sia tera.

L'identità l'è se recognoscer te doi bandieres, chela dai set colores che duc i fascegn porta tel cher, segn che sion desvalives ma duc ensema fazon n maraveous ercabuan, te la bandiera del popul ladin, che l'è i trei più bie colores de la Ladinia, l brun del ciel, l bianch de la neif, l vert del bosch!!!

L'identità l'è fadia de stèr te na val da mont, olache no l'è l comet de na zità, olache no l'è nia de sori, dut é n muie dalenc, servijes, sanità, scola, strèdes e ferates, no te ès nia vejìn a cèsa, ma dut un te ves viver te tia val perché alò ti es nasciù e alò l'è tie cher.

L'identità l'è sacrificies, chi che à fat nesc veies che i ge à sbregà via a la tera chel pech che la dajea, chi che fazon nos jent d'aldidanché, te na val olache rua n grumon de foresc, che ne dèsc lurier e pan, vèlch outa i é sci tenc che ne sà de no poder se mever,

ma ge sporjon bolintiera l benvegnù ajache saon che chest l'è chel che ne dèsc da viver zenza cognèr se n jir a la foresta.

L'identità l'è ence l son de l'Aimaria da doman e da sera, chela ciampèna che ne envià a uzèr l cef al Ciel e dir deelpai de dut chel che aon, l'è chela orazioni che tia mèr disc dal prum moment canche te vegnes al mondo enschin canche ela sera i eies, l'è chi vèrse per jir a geija de tie pèr che col cher l met sia familia e sie lurier te la mans del Signoredio.

L'identità ladina l'è se tirèr ite chel bel guant de noscia giaves, chel a la fascèna o chel da "veteraner", sentir che l sera ite i sentiments più fons de noscia storia e cultura, ma no se pel se l meter demò per se fèr bie, per jir en defilèda o per folclor, te chel guant cogn esser ite nosc cher ladin.

L'identità l'è se recognoscer te chisc monts, per zachei l'è na seida olache no se pel vardèr sorafora, per l ladin l'è la crepes che vèrda via nesc paljes, l'è spic che ne deida a vardèr en aut e a fèr semper miec co l'aiut del Ciel.

L'identità l'è l color de l'enrosadira, che à soscedà te nesc veies conties encantejimèdes, desche chela de Re Laurin e sie vidor de reses, chest fior, che tel pensier de nesc veies vif te anter i sasc, canche crepa l'èlba o fior soreie, anterores l'entenc de resa noscia crepes, soscedan marevea e encant.

L'identità l'è chel sentiment che cresc con te, l se fèsc amò più fort canche te cognes te n jir da tia tera, canche no te sès se te vegnarès de outa, enlouta te sentes de esser ladin, l pensier l va deretorn ai bie recore de cèsa e l'encresciujum te strenc l cher.

L'identità l'è chela picola steila da mont, fior delicat, tel medemo temp fort e gaert, per tegnir fora la vita ria da mont. Na steila che vif sun picola zopes, con pecia tera, su per i sasc, tachèda a la crepa, fosc apontin chesta l'è l'identità più fona, chela de n cher ladin che tel jir de la vita, te la lègremes e te la legreza, l vif con fadia ma ence con gran amor, te chisc paljes pricolé sù per erc japede a chesta bela crepes.

Annelise Vian



L'identità ladina l'è vèlch che aon daite.